

06/04/2002

Malaysia terus sokong perjuangan Palestin

Tuan Nazuri Tuan Ismail

KUALA LUMPUR, Jumaat - Malaysia akan terus menyokong perjuangan rakyat Palestin yang mahu menubuhkan sebuah negara merdeka dan berdaulat, kata Menteri Luar, Datuk Seri Syed Hamid Albar.

Beliau berkata, sokongan padu rakyat pelbagai kaum negara ini akan menguatkan lagi gesaan dan pendirian Malaysia yang mahu Israel meninggalkan bumi Palestin supaya sebuah negara merdeka dapat diwujudkan.

"Selagi kita bersuara dan tegas, kita akan mampu membantu memerdekakan rakyat Palestin. Ini semua dapat kita lakukan di bawah pimpinan Perdana Menteri, Datuk Seri Dr Mahathir Mohamad," katanya ketika berucap pada Perhimpunan Perpaduan Untuk Palestin, anjuran Pergerakan Pemuda Umno di perkarangan Pusat Dagangan Dunia Putra (PWTC) di sini, hari ini.

Lebih 1,000 orang termasuk pemimpin politik, pertubuhan bukan kerajaan (NGO) dan pelajar pusat pengajian tinggi menghadiri perhimpunan yang bertemakan 'Selamatkan Palestin'.

Perhimpunan itu bertujuan menyatakan sokongan rakyat Malaysia terhadap perjuangan rakyat Palestin dan membantah tindakan Israel menceroboh dan membunuh penduduk Palestin

Selain membawa kain rentang dengan kata-kata semangat menyokong rakyat Palestin dan mengutuk Perdana Menteri Israel, Ariel Sharon, perhimpunan itu turut disemarakkan dengan bacaan sajak beberapa pemimpin dan aktivis masyarakat.

Antaranya, Datuk Lee Lam Thye, Tan Sri Mohamed Rahmat, Datuk Seri Dr Mohamad Khir Toyo dan pemenang pengacara Jemputan Nona, Norjuma Habib Mohamed selain persembahan nyanyian kumpulan Rabbani yang menyampaikan lagu Intifada.

Orang ramai yang mahu menyatakan sokongan terhadap perjuangan rakyat Palestin menentang Israel boleh menghantar e-mel ke alamat freepalestine@pemudaumno.org.my.

Sementara itu, Ketua Pergerakan Pemuda Umno, Datuk Hishammuddin Hussein, yang menyerahkan memorandum bantahan serangan Israel terhadap Palestin kepada Syed Hamid, meminta kerajaan menggunakan apa saja saluran supaya serangan itu dihentikan.

Beliau berkata, pihaknya juga akan berbuat apa saja bagi mengisi Tabung Kemanusiaan Rakyat Palestin yang dilancarkan baru-baru ini.

"Apa jenis bantuan yang akan diberikan kepada rakyat Palestin bergantung kepada Syed Hamid. Tugas Pemuda Umno ialah mengisi tabung itu dengan apa cara sekali pun," katanya.

Duta Palestin ke Malaysia, Ahmad Al-Farra yang turut hadir di perhimpunan itu berkata, pihaknya berterima kasih kepada rakyat dan kerajaan Malaysia yang memberi sokongan padu perjuangan rakyat Palestin.

(END)